

2 Corintios

Õpa gojabeoñumi Pablo Corinto majaräre

1 ¹Yũhũ Pablo Jesucristo yare ïgu buhedore ïgu apidigu ähraa. Mari Pagũ ïgu gamero dopa ta apimi yũre Jesu. Yũhũ, mari acaweregu Timoteo mera mũare Goãmũre umupeoräre Corinto majaräre gojabeoa. Árípehrerã Jesucristo yaräre Acaya majaräre mũa sãre gojabeoa. ²Eropirã Goãmũ mari Pagũ, mari Opũ Jesucristo mera mũare õadorea. ïgu itamuro mera õaro árique mũa.

Pablo ïgu ñero tarirare õpa arĩ wereñumi

³Mari Opũ Jesucristo Pagũ Goãmũ marire mojomoro ïhami. Eropigu ïgu dihta marire árípehrerinũri õaro siporãcucũ iimi. “Õatariagu ährimi ïgu,” arãa mari. ⁴Mari ñero taricũ ïagu marire ïgu yaräre itamumi ïgu gajiräre mari itamuboro dopa. Eropirã gajirã erã ñero taricũ erãpũre itamuro gahmea marire. Goãmũ marire ïgu itamuro dopa ta mari sã eräre itamurã. ⁵Cristo yarã mari árirã ïgu ñero taridiro dopa ta mari sã burigã ñero taria. Mari ñero taridiro dopa ta ïgu itamurire wũaro opaa. ⁶Gũarũ mũare itamurã ñero taria. Eropirã Cristo mera mũa õaro áriboro dopa gũa mũare werera dipuwaja gajirã ñero iima gũare. Gũa ñero tariquerecũ Cristo gũare itamumi. Eropirã Cristo gũare itamucũ gũarũ mũa sãre itamumasia. Eropirã gũa ñero taridiro dopa ta mũa sã ñero tarirã õaro mera yujuro bojerãca. ⁷Õaro mera mũa yujuro bojerã áriborore gũa masia. Gũa ñero taridiro dopa ta ñero taria mũa sã. Eropirã Goãmũ ïgu itamuri mera gũa yujuro bojediro dopa ta mũa sã yujuro bojerãca.

⁸Gũa acawererã, dohpaguere ire mũa õaro masicũ gũa gahmea. Asia yebaguere ñetariaro taribũ gũa. Gũa gamero iirã ne bocatiubiriboya. Õpa arĩ pepiribũ gũa: “Ne bocatiusome mari. Eropirã mari sirirãca,” arĩ pepiribũ gũa. ⁹Eropirã “Marire wejẽcãrãcoma,” arĩ pepiribũ gũa. Gũa eropa ñero taribũ Goãmũ dihtare gũa guñaturaboro dopa. ïgũrũ sirinirãre masugu ährimi. Eropa ïgũre guñaturã gũa gamero gũa bocatiubirirare masia. “Goãmũ ta marire itamumi,” arãa pare. ¹⁰⁻¹¹Gũare guhyaquerecũ ta ïgu itamuro mera taribũ. Pũhrũgue sãre dipaturi gũare taugũcumi. Mũa sã gũare itamumorã mũa Goãmũre serẽbasacũ sãre ïagu ïgu gũare taugũcumi. “ïgu ta gũare taugũcumi,” arĩ masia mari. Eropirã

ĩgu guare taucũ ĩarã, ĩgure “Ōhaa” arĩrãca mũapũ. Mũa bajarã serẽrare ĩgu yuhricũ ĩarã “Ōhaa, diaye ta ãhraa,” arĩrãca mũa bajarã Goãmure.

Pablo Corintogue ĩgu wadiarare wereñumi

¹²Eropirã gũa iirare guñarã mucubiriri mera õpa arĩ pepia gũa: I yebare Goãmũ ĩgu itamuro mera ñeri mariro õari mera masare wapicũ buhebu. Mũa sãre õaro wapicũ buhebu. Ōpa iirã gũa masiri mera iibiribu. Goãmũ guare ĩgu mahicũ ĩgu turari mera eropa iibu gũa. ¹³⁻¹⁴Eropirã õaro were mũare gojabeorã diaye ta werebu mũare õaro mũa masiburire. Dohpague guare õaro masinibea gũa. Gũa áricũre mũa turaro masicũ gahmea gũa. Eropirã mari Opũ Jesucristo dujaricũ gũa mera mucubirĩrãca mũa. Mũa mera gũa mucubiridiro dopa ta mũa sã gũa mera mucubirĩrãca.

¹⁵⁻¹⁶Eropa arĩ pepigũ Macedonia yebague wagũ mũa pohrogue wamũhtadiarabũ. Eropigũ mũare ĩhatariwahgãboya. Eropigũ erogue ejadigũ dujarigũ dipaturi mũa mera bajamenũrigã áriboya yũhũ. Eropirã pesubu mũa mera yũ áricũ ĩarã turaro mucubiriboya mũa. Mũa pohrogue yũ áricũ ĩanirã Judea yebague yũ wacũ ĩarã yũre itamuboya mũa. ¹⁷“Wagũra,” yũ aricũ peenirã árirã, yũ wabiricũ ĩarã “Pablo Jesure umupeobirã iro dopa gũyagũ iĩnumi,” ¿arĩ pepiri mũa? “Wagũra, arĩqueregũ ĩgu gamero mari pohro aridiabiriñumi ĩgu,” ¿arĩ pepiri mũa yũre? “Ĩgu arĩdiro dopa iibeami,” ¿arĩ pepiri mũa? ¹⁸Eropa arĩ gũyagũ iibeaa yũhũ. Eropigũ “Iigũra,” arĩgu yũ arĩdiro dopa ta diaye ta iiaa yũhũ. Iire masimi Goãmũ. ¹⁹Yũhũ, Sila, Timoteo mera Jesucristo Goãmũ magũ yare mũare werebu. ĩgu Jesucristo “Iigũra,” arĩgu, diaye ta iigu ãhrimi. Goãmũ ĩgu arĩdiro dopa ta Cristo iimi. ²⁰Áripehri ĩgu Pagũ ĩgu masare “Ōpa õaro iigũra,” arĩ wererare Cristo iipehocãdi árimi. ĩgu eropa iigu áricũ gũa ĩgu yare gajirãre werea Goãmure erã umupeoboro dopa. ²¹Cristo yarã marire árinigicũ iigu Goãmũ ta ãhrimi. Eropigũ ĩgu yare weremorãre marire apimi ĩgu. ²²Eropigũ ĩgu yarã mari áricũ ĩagu irire marire masicũ iimi ĩgu. Eropigũ ĩgu Espĩritu Santore mari mera áridoremi ĩgu. Mari mera áricũ ĩha Goãmũ ĩgu marire õaro iiburire masia mari.

²³Dohpaguere yũhũ mũa pohro wabirirare diaye ta weregũra mũare. Yũ wereri diaye áricũ Goãmũ masimi. ĩgu ta yũ pepirire masimi. Mũa ñero iira dipuwaja turidiabigũ mũa pohroguere wadiabiribu. Erãre bujawerecũ iiri, arĩgu mũa pohroguere Corintoguere wabiribu. ²⁴Eropirã “Mũare dorerã ãhraa gũa,” arĩrã iibeaa. Eropirã “Ōpa Cristore umupeoro gahmea mũare,” arĩrã iibeaa gũa. Mũa Cristore õaro umupeotuhabũ. Mũare umupeonemocũ iirã mũa õaro mucubirĩrã áricũ iidiaca gũa.

2 ¹Wabigũ õpa arĩ pepibu: “Dipaturi erãre bujawerecũ iidiabeaa. Eropigũ dohpaguere wabeaa,” arĩ pepibu. ²Mũare bujawerecũ iidiabeaa. Mũa bujawerecũ ĩagu yũpũ mucubiribiriboya. Eropirã yũre mucubiricũ iimorã áribiriboya mũa sã. ³Eropigũ mũa pohrogue wabiribu. Wabigũ

mua árīricūre amuboro dopa muare gojabeobu. Mua yūre mucubiricū iibonirā árīquererā ta yūre bujawerecū iiboya mua mua pohrogue yu wacū. Mua mera yu mucubiricū mua sã yu mera mucubirirāca. Irirre masia yuhu. Eropigu mua mera bujawerediabigu “Wabeaa,” arī, carta gojabeobu. ⁴Eropigu muare gojagu wuaro pepigu ñero siporācugū, turaro co deco wiriri mera muare gojabeobu. Eropa gojagu muare bujawerecū iidiabiribu. Muare yu burigā mahirare muare masicū iidiagu muare eropa gojabeobu.

Erā mera majagu īgu ñero iirare cādijidoreñumi Pablo Jesu yarāre

⁵Mua mera majagu īgu ñero iira mera yūre bujawerecū iimi īgu. Muare īgu turaro bujawerecū iidiro dopa ta yu säre wuaro bujawerecū iimi īgu. Īgu marire eropa burigā bujawerequerecū ta wātariaro dipuwaja moadorebeaa dohpaguere. ⁶Bajarā mua mera majarā īgu ñero iira dipuwaja moatuhāñorā. Iripēta dipuwaja moa duhuro gahmea īgure. ⁷Īgure mua dipuwaja moaniguicū burigā bujawerebocumi īgu. Eropigu Cristo yare duhubocumi. Eropirā īgu ñero iirare cādijique mua. Īgure itamuque īgu ōaro siporācuboro dopa. ⁸Eropirā īgure ōaro iique mua īgure mua mahirare īgu masiboro dopa. Mua eropa iicū burigā gahmea yuhu. ⁹Ero core muare gojabeogu “¿Diaye ta yūre yuhrirācūri?” arī pepigu gojabeobu muare. Yūre mua yuhricū iadiagu gojabeobu. ¹⁰⁻¹¹Dohpaguere īgu ñero iirare mua cādijicū īagu yu sã īgu ñerire cādijigura. Yūre ñero iibirimi īgu. Muapūre ñero iidi árīmi. Īgu eropa iidigu árīquerecū ta īgu ñero iirare cādijia yu sã. Muare ōaro itamudiagu Cristo īgu ĩhabeoro īgu ñero iirare cādijia. Irirre cādijia Satana marire īgu tarinugabiriboro dopa. Īgu mari ñerire iicū gahmemi. Irirre ōaro masia. Eropirā Jesu yarā erā ñeri iirare guñanigulbeaa mari Satana yapūre iiri arīrā.

Troa waicūri maca árīgu Titore bocabigu wuaro bujawere pepiñumi Pablo

¹²Eropigu Troa waicūri macague Cristo yare buhegu ejaribu. Eroque yu ejačū bajarā masa ōari buherire peediarā árīma. Mari Opū īgu itamuri mera īgu yare yu buherire peerā bajarā masa árīma. ¹³Eropa árīquerecū ta mari acaweregu Titore bocatiribirinijagu wuaro bujawere pepigu erore árīmasibiribu, Eropigu ero majarāre goeriseretuhagu Macedonia yebague waha wabu īgure amagu.

Goāmū marire tarinugacū iimi, arī gojañumi Pablo

¹⁴Goāmūre mucubiriri mera “Ōhaa,” arāa. Goāmū ñerire árīpehrerire tarinugagu āhrimi. Cristo yarā mari árīcū īagu marire tarinugacū iimi. Poresudiro poresu sehyaboro dopa ta āhraa mari. Poresu sehyaro dopa ta Goāmū dorero mera árīpehreroguerre Cristore masicū iiaa mari. Eropa īgure masirā erā ōaro pepima. ¹⁵Cristo yarā árīrā masare Cristore guñacū iiaa mari. Mari eropiicū ĩha Goāmū mucubirimi. Masare Cristore guñacū iicū erā īgu árīrre masima. Goāmū īgu taumorā Cristo árīrre masima. Gajirā erā peamegue wamorā sã Cristo árīrre masima mari mera. ¹⁶Cristo árīrre masirā erā peamegue

wamorãpũ peamegue erã waborore masima erã. Goãmũ ãgu taumorãpũ áripehrerinũri ãgu mera erã áriburire masima. Eropirã ire Cristo yare mari mari gamero mera buhe ojogorocũmasibea. Goãmũ ãgu itamuri mera ta mari ãgu yare buhe ojogorocũmasia. ¹⁷Bajarã gajirã Goãmũ yare buhemaacãma niyerure wajatadiarã. Guapũ erã iro dopa ta iibea. Guayaro mariro Cristo ãgu turari mera ãgu yare buhea gũa. Goãmũ guare ãgu obeorã árirã ãgu ãhurore õaro buhea gũa.

“Õpa iigũra,” Goãmũ ãgu arĩ werepirare mama buherire wereñumi Pablo

3 ¹¿Dipaturi gũa áricũrĩre mũare wererã iiri gũa mũa pepicũ? Gajirã mũare erã buheboro core erã buheri queoro áririre masidiarã erã gojarapũre serẽmũhtabu mũa erãre. ¿Guare masitahaquererã ta iripũnore serẽri mũa guare? ¿O gajirã pohrogue gũa buherã warã iripũnore guare aigãro gahmeri mũa pepicũre? ²Iripũnore gamebea gũa. Muapũre õari gohrotonirãre áripehrerã gajirã ãarã mũare gũa õaro buherare masirãcoma. Mũare gũa buhecũ Cristore umupeorã ãgu yarã árinũgabũ mũa. ³Cristo yarã mũa áricũ ãarã masa mũare Goãmũ ya buheri gohrare gũa queoro buherare masituhama. Mũare buherã Goãmũ yagu Espĩritu Santo ãgu itamuri mera buheabũ. ãgu Goãmũ ojocarĩgu gohra áhrimi. Gũa eropa buhecũ peerã Cristore õaro gahmeabũ mũa. Eropa gamerã mũa áricũ gajirã mũare ãarã Cristo yarã mũa áririre õaro masima. Eropa masirã mũare Goãmũ ya buheri gohrare gũa queoro buherare masima masa.

⁴Eropa wacũ masia gũa Goãmũre guñaturari mera. Cristo ãgu itamuri mera eropa guñaturanigũia mari. ⁵⁻⁶“Gũa gamero i mohmerire iiaa gũa,” arĩmasibea. Goãmũ ãgu itamuri mera ire iiaa gũa.

Eropĩgu dohpaguere ãgu wererire õari buherire Goãmũpũ õaro guare buhemasicũ iimi. Eropa buherã iribojegue ãgu doreri Moisere ãgu apira dorerire buhebea. Espĩritu Santo mera mari Goãmũ mera õaro áriburĩpũre buhea gũa. ãgu dorerare mari gamero mera ne bocatiubea. Eropa mari bocatiubirira dipuwaja peamegue waboya mari. Espĩritu Santopũ mari Goãmũ mera áripehrerinũri õaro árinũguicũ iimi. Õari buheri buhecũ peeñanirãre õaro árinũguicũ iimi.

⁷Goãmũ ãgu dorerire utãmijiriguge gojanijagu Moisere apĩñumi. ãgu eropa apira pũhrũ ãgu áriro gosesiriri dehyoamũriyoro Moisere “Goãmũ ãgu apira õari áhraa,” arĩro dopa. Eropiro Moise diapo bũrigã gosesiriyoro. Cuimiju áriyoro. Pũhrũ ãgu gosesiriri pehrerisubu ãgu áriquerecũ ta masa ãgũre ne ãamehtumasibiriñuma. Iri dorerire ãgu apira pũhrũ iri dorerire iibirã masa dipuwajacũrã peamegue wamorã wañuma. Eropiro iri doreri masare peamegue wadorequerero ta, Goãmũ ãgu áriro gosesiriri mera árinũgayoro. ⁸Iri doreri tauro õari buheripũ “Jesucristo masare taumi,” arĩ buheri õataria. Iri buherire gajirãre mari buhecũ erã õaro peecũ Goãmũ ta erã mera árigũcumĩ ãgu Espĩritu Santo mera. Eropiro iribojegue maja doreri tauro Cristo ya buheripũ õataria. ⁹Goãmũ Moisere apira doreri iribojegue maja masare peamegue wadoreyoro. Eropa dorequerero Goãmũ ãgu gosesiriri mera árinũgayoro. Iri tauro õari buheripũ Goãmũ ãgu turari mera áhraa. Iri buheri mera õarã wahama masa Goãmũ ãgu ãacũ. ¹⁰Iribojegue Goãmũ ãgu doreripũ turari

árriquerero dohpaguere bu gohra ta áhrra. Óari buheripũ iri tauro turataritari áhrra. Iri buheri mera umaroguere mari wamasia. ¹¹Iribojegue Goãmũ ãgu doreri Moiserẽ ãgu apira doreri Goãmũ gosesiriri mera árnũgaquerero ta pehreburi árriyoro. Óari buheripũ “Jesu marire taugucumi,” arĩ buheripũ árnũgucãroca. Eropiro “Iri doreri tauro óari buheripũ óataria,” arĩ masia mari.

¹²Irire eropa masirã, güiro mariro óari buherire óaro werepehocãa gũa. ¹³Moise gũa iro dopa árrĩbirĩnumi. ãgũre Goãmũ ãgu gosesiriri pehrerore yũ acawererã masiri arĩgũ dopa ãgu diapore suhri gasiro mera cãhmotacãnumi Moise. ¹⁴Moise ãgu diapore ãgu cãhmotacũ Goãmũ gosesiririre ãgu óarire erã ñecũ sumarã íhmasibiridiro dopa ta erã dohpaguere óari buherire óaro masibeama. Goãmũ wererire iribojegue erã gojarapũrĩre erã buherã ne masibeama erã Israe masapũ. Cristore gamebirã masisome erã. ãgũre umupeorã tamera ãgu yare masirãcoma. ¹⁵Dohpague sãre Israe masa Goãmũ dorerire Moiserẽ ãgu apirare buhequererã, erãre cãhmotaro dopa ta ne masibeama erã. ¹⁶Erã mari Opũre Jesucristore erã gamecũ ãgu ta erãre masicũ iimi. Iri cãhmotarĩnere aĩro dopa ta mari Opũ marire ãgu yare óaro masicũ iimi. ¹⁷“Mari Opũ,” arĩrã Espĩritu Santore arĩrã iiaa. Mari Opũ ãgu Espĩritu Santo mari mera ãgu árcũ ãgu yarã áhrra. Eropa árrĩrã “Iribojegue maja dorerire iiro gahmea Goãmũ yarã árrĩmorã,” arĩbeaa mari. ¹⁸Eropirã Jesu yarã árrĩrã, Jesucristo ãgu óarire íhmurã iiaa mari. Eropĩgũ mari Opũ Espĩritu Santo marire gohrotocũ iimi. ãgu eropa iicũ Cristo óagũ árrĩdiro dopa ta óarã warã iiaa mari sã.

4 ¹Goãmũ gũare mojomoro iagũ, óari buherire weremorãre apimi gũare. ãgu eropa apicũ masirã ãgu yare buherã duhudiabeaa. ²Masa íabiro ñerire iicoreri gũhyasiuri áhrra. Irire gũapũ ne iibeaa. ãgu yare buherã gũyarire buhebiribũ. Eropirã gũa Goãmũ yare ne gohrotobeaa. Eropa iibirã óari buherire óaro diaye buhea gũa Goãmũ ãgu íhuro árrĩrã. Gũa eropa árrĩrcũrĩre árrĩpehrerã óaro masima gũare íarã gohra. ³Gũa iri buherire óari buherire werea. Gũa irire buhequerecũ ta gajirã masibeama. Eropa masibirãpũ peamegue wamorã áhrrima. ⁴Satana ñegũ i yeba majarã opũ erãre Goãmũ yare masibircũ iimi. Cuiiri íhjabirã erã íhjabiro dopa ta masibirã wacũ iimi erãre. Óari buherire Cristo ãgu turarire erã masibirã wacũ iimi ãgu erãre. Cristo Goãmũ ãgu árrĩrcũrĩre opami. ãgu Cristo Goãmũ gohra ta áhrrimi. ⁵Gũa buherã “Gũapũre umupeoque,” arĩ buhebeaa. Ópa arĩ buhea gũa: “Jesucristopũ áhrrimi mari Opũ,” arĩ buhea gũa. Gũapũ Jesure yũhrrĩrã áhrra. Eropirã mũare itamurã áhrra gũa. ⁶Negohraguere ópa arĩ dorepũ Goãmũ i mũmũ naitĩaro árcũ: “Boyoro árrĩque,” ãgu arĩcũ boyoa wayoro. Eropĩgũ dohpaguere ãgu ta iri turari mera marire masicũ iimi boyoro árrĩro dopa. Eropa marire masicũ iigũ ãgu óaro árrĩrcũrĩre marire masicũ iimi. Jesucristore masirã ãgu Pagũ ãgu óaro árrĩrcũrĩre masia mari.

Cristo turari mera mari áhrra, arĩ gojañumi Pablo

⁷Eropa masirã árrĩrã, Goãmũ ãgu turarire gajirãre masicũ iiaa. Eropa iirã árrĩquererã ta turabirã áhrra gũapũ. Mátasoro mata wahrirasoro iro dopa ta

gua sã turabirã ähraa. Gua eropa turabirã áriquererã ta gua masare Goãmũ yare werecũ iarã, gua gamero mera iimasibirare iarã õpa arĩ masirãcoma erã. “Goãmũ turari mera eropa arĩ wereniguima marire,” arĩrãcoma masa. Eropirã Goãmũpũre umupeorãcoma. ⁸Áripehrerã gajirã guare ñero iiquererã ta Goãmũ guare taucũ erã guare tarinugabeama. Eropirã gua gariborequererã ta ne Goãmũ yare buhe duhudiabea. ⁹Guare erã ñero iiniguiquerecũ ta Goãmũ guare eropa itamuniguicãmi. Guare erã pamehpiquerecũ ta ïgu itamuri mera siribeaa gua. ¹⁰Erã wejësũmorã áricãrã tiiaa gua Cristo i yebaguere ñero ïgu taridiro dopa ta. Erã wejësũmorã áriquererã eropa áriniguirã tiiaa gua sã Cristo ïgu ojocaririre ïhũmorã. ¹¹Eropirã mũmri nũcu gajirã guare wejẽmaja guhya ährima Cristo yarã gua áriiri dipuwaja. Õpa ta ñero tariquererã áriniguia gua Cristo ïgu ojocaririre ïhũmorã. ¹²Eropirã mũare gua buheri dipuwaja guare gajirã wejẽmaja guhya ährima. Gua buherire mũa peenirãpũ mũmri nũcu Goãmũ mera árimorã ähraa.

¹³Goãmũ yare erã gojarapũ õpa ähraa: “Goãmũre umupeobũ. Eropigũ ïgu yare werebũ,” arĩ gojañumi iribojegue majagu. Gua sã yujuropa ta ähraa. Goãmũre umupeorã ïgu yare werea. ¹⁴I sãre õaro masirã ïgu yare werea gua. Cristo ïgu sirira pũhrũ Goãmũ ïgure masudi árimi. Eropigũ Cristo yarã mari áricũ ïagu ïgu mari sãre masugũcumi. ïgu eropa masura pũhrũ ïgu pohrogue aigãgũcumi marire. ¹⁵Eropirã mũare itamudiarã ñero taria gua. Eropirã Cristo yarã mũa bajarã warã, bajarã mũa Goãmũre mucubiriri mera umupeorãca. ïgure “Õhaa,” arĩrãca.

¹⁶Mũa eropa umupeocũ iarã, gua ñero tariquererã ta bujawerebeaa. Eropirã Cristo yare were duhubeaa. Gua dũpũ mũmri nũcu turabiri wahgãro iiaa. Eropa turabiri wahgãquererã ta õaro siporãcũa Jesucristore guñaturari mera. ¹⁷Dohpaguere ñero tariquererã ta pũhrũ ñero tarisome. Eropirã Cristo yare were duhubeaa. Iri ñero mari tariri pehrea waroca. Eropirã marire merogã ñero tariro gahmea. Eropa mari ñero tarinirã áriãrã, pũhrũguere wũaro mucubiriri mera áriniguirãca Goãmũ mera. Eropirã mari ñero taridiro tauro burigã mucubiriri mera eropa áriniguicãrãca. ¹⁸Eropirã mari iarire dohpaguere mari warore guñanũrubeaa. Mari ïabiriripũre pũhrũ mari Goãmũ mera áriniguiburire guñanũrũa. Mari dohpaguere ïari pehrea waroca. Mari ïabiriripũ áriniguicãroca.

5 ¹I sãre masia mari: Wihire mari cóãdiro dopa ta mari dũpũre cóãrãca. Eropigũ mama wihi iibodiro dopa ta Goãmũ mama dũpũre iigũcumi. Eropigũ iri dũpũre marire ogũcumi. Eropirã mũmaroguere eropa áriniguirãca iri dũpũ mera. Irire masirã ñero tariquererã Goãmũ yare duhubeaa. ²Eropirã iri dũpũre mũmaro maja dũpũre turaro gamerã, mari eropa coreniguirã iiaa. ³Suhrirore turaro mari sañadiaro dopa ta iri dũpũre turaro gahmea mari. Eropa ta cohrea mari iri dũpũ marirã árdiãbirã. ⁴Dohpague maja dũpũre cóãdiãbriquererã mũmri nũcu Goãmũ mera mari áriburi dũpũre burigã gahmea mari. Eropirã i mari dũpũ siriburi dũpũ iri áricũ masirã, mama dũpũ mera Goãmũ mera eropa áriniguidiaa mari. ⁵Mari ïgu mera áriniguiborore amuyudi árimi Goãmũpũ.

Eropa amuyugũ ĩgu Espírítu Santore omũhtami marire. Eropigu ĩgu Espírítu Santo mari mera áricũ ĩha marire Goãmũ ĩgu iiborore, “Diaye ta áhrra,” arĩ masia mari.

⁶Eropirã Goãmũ mera sĩporã turarã áhrra. Güiro mariro áhrra mari. I sãre mari masia. I dũpũ mari árimũhtara dũpũ mera árirã, mari Opũ pohro árinibea. ⁷Umaro majare Goãmũ sãre mari ĩabiriquererã ta “Īgu diaye ta áhrimi,” arĩ masia mari. Eropirã ĩgũre umupeoa. ⁸Eropirã mari Goãmũ pohro waborore masia. Mari dũpũre i yeba maja dũpũre cóãrã mari Opũ mera umarogue mari áridiaa. ⁹Eropirã Cristore mucubiricũ iidiaa mari. I yeba maja dũpũ mera árirã ĩgũre mucubiricũ iidiaa mari. Umarogue árirã sã ĩgũre mucubiricũ iidiaa. ¹⁰Áripehrerã Cristo pohrogue mari wacũ ĩagũ ĩgu mari iirare beyegũcumi. Eropiro mari iira masisũroca. Eropigu marire óarire mari iira wajare ogũcumi. Ñerire mari iira waja sãre ogũcumi. Īgu eropa beyegũ áricũ masirã ĩgũre mucubiricũ iidiaa mari.

Goãmũre mari mera óaro áricũ iimi Cristo, arĩ gojañumi Pablo

¹¹Eropirã guhyadiaro mera mari Opũre umupeoro gahmea marire. Īgu marire eropa beyeburire masirã, Cristo yare masicũ iiaa gua masare. Erãre güisãrã, ĩgũre umupeocũ iidiaa gua. Gua óarã áririre Goãmũ óaro masimi. Gua eropa iirire mũa sãre óaro masicũ gahmea yũhũ. ¹²Dipaturi gua óarã áririre mũare wererã iibea. “Gajirãre tarinũgaa,” arĩmaacãnirãre mũa wereburire eropa wererã iiaa gua mũare. Erã basi eropa arĩ pepirãpũ erã pepiriguere ñerã, guyaricũrã áriquererã ta masa erã ĩhuro dihtare óarã iro dopa iirima. Eropirã mũa guare mucubiriboro dopa, “Óaro iirã iima,” gajirãre mũa guare arĩ cãhmotaburire i áripehrerire mũare were gojarã iiaa. ¹³¿Gua ópa arĩ wererã pee masibirã áhriri gua mũa ĩacũ? Masa guare ĩarã pee masibirã iro dopa ĩhama guare. Goãmũ yare gua werecũ ĩarã eropa ĩabocoma guare. Erã eropa arĩ ĩabonirã áriquererã ta pee masirã ta áhrra gua mũare eropa itamumorã. ¹⁴Cristo ĩgu guare mahicũ ĩarã masare eropa itamua. Īgu eropa mahicũ ĩarã ĩgu yare eropa buhenigua gua. Marire mahigu yujugu ta Cristo mari áripehrerã ya ñeri dipuwajare sĩridi árimi. Eropigu áripehrerã mari ñeri dipuwajare sĩrimorã árinirãre sĩribasadi árimi. Irire guñarã ĩgu yare iinigua gua. ¹⁵Áripehrerã mari ñeri dipuwajare sĩridi árimi ĩgu mari gamero dopa mari iibiriboro dopa. Eropigu ĩgu gameripũre iidoregu sĩridigu árimi ĩgu. Maripũre Goãmũ pohrogue mari ejaborore eropa sĩridi árimi. Īgũpũ mari ya áriburire sĩrira pũhũ masa mũriadi árimi. Eropirã mari gamero dopa mari ñaribejarire iibirã ĩgu yare iiro gahmea pare marire. ¹⁶Eropirã dohpaguere Jesure gamebirã gajirã erã áricũre ĩha werewũaro dopa ne arĩ ĩabea gua. Iribojegure gua Cristore eropa ĩaquererã dohpaguere ĩgũre óaro masia. ¹⁷Eropirã áripehrerã Cristo yarã warã óaripũre gohrotoa mari. Iribojegue mari gamero mari árirare duhucãa mari. Dohpaguepũre óaripũre corerã iiaa mari.

¹⁸Goãmũpũ marire óarire gohrotocũ iimi. Iribojegue mari Goãmũ mera óaro áribirimũriibũ. Eropigu Jesucristo mari ñeri iira dipuwaja sĩribasara mera Goãmũ marire ĩgu mera óaro áricũ iidi árimi. Eropa iigu guare ĩgu yare buhedoregu apimi.

Eropa buherã, gajirãre Goãmũ mera erã õaro áricũ iiaa gũa sã. ¹⁹Õpa arĩ masare weredoremi Goãmũ guare: “Mari masa ãgu mera õaro áribirinã áriquerẽcũ Goãmũ Cristo sãrira mera marire ãgu mera õaro áricũ iimi. Eropigu Cristore mari umupeocũ ãagu mari ñeri dipuwajare dipuwaja moabeami Goãmũ marire,” arĩ weredoremi Goãmũ guare. ²⁰Eropirã Cristo yare weremorã ãgu obeonirã áhrra gũa. Goãmũ ãgu basi muare ãgu werebodiropã dopa ta guapũ muare õpa arĩ werea: Cristore werebasarã iiaa. Eropirã muare werea. Goãmũre mũa ihaturirare iripẽta duhuque. ²¹Cristo ãgu ñerire iibiriquerẽcũ ta Goãmũ ãgure mari ñeri dipuwajare sãridoremi árimi. Eropa iigu mari ñeri dipuwajare dipuwaja moadi árimi Goãmũ ñeri dipuwajare dipuwaja moabeami Goãmũ marire,” arĩ Jesucristore. ãgu eropa iidi árimi Cristo yarã mari wacũ, Goãmũ iropã dopa õarã mari áriropã dopa.

6 ¹Goãmũ eropa iigu ãgu muare ãgu õaro mojomoro ãarare ihmumi. Eropirã Goãmũ yare mohmebasarã árirã ire turaro muare iidorea gũa. Goãmũ õaro iirare õari buherire mũa peediropã dopa ta iique mũa. Mũa peediropã dopa ta mũa iibiriocũ mũa peera duhpiburi áribea. ²Õpa arĩmi Goãmũ ãgu yare erã gojarapũgue:

beami Goãmũ marire,” arĩ Muare yũ õaro iiburinũri áricũ mũa serẽre pee yũhriũra. Eropigu muare peamegue wabonirãre yũ tauburinũri áricũ itamugũra, arĩmi ãgu.

Peeque mũa. Dohpague Goãmũ masare ãgu õaro iiburinũri áhrra. Dohpague masa Jesucristore umupeoburinũri áhrra Goãmũ erãre tauboro dopa. Eropirã dohpague ãgure umupeoro gahmea, arĩ werea gũa.

³“¿Õari buheripũre gamebiribocuri?” arĩrã, ne merogã gajirãre ñero iibeaa gũa. Gajirãre ne ñero arĩ wereniguibeaa. ⁴Ire iibirã Goãmũ pohro majarã gũa áririre muare masicũ iidiaa. Eropirã ãgu yare buherã õpa áhrra gũa: Ñero tarirã gajino moorã bocatũua. Guare erã ñero iiquerẽcũ ta guaro mariropã áhrra. ⁵Õpa ñero taribũ gũa: Masa guare pacũ, peresu erã iicũ, masa bajarã guare wejẽdiarã erã gaguiniguicũ peerã ñero taribũ gũa. Gũa turaro mohme oẽarã sã, wũja pũriquerẽcũ ta carĩbirã sã, oaboarã sã ñero taribũ. ⁶Eropirã õaro áriocuri mera diaye buhebu. Eropirã Goãmũ yare buherã õaro masiri mera buhebu muare. Eropirã ne guabiribũ gũa. Eropirã õaro mera buhebu gũa muare. Eropa iirã Goãmũ pohro majarã gũa áririre ihmurã iibũ gũa muare. Espĩritu Santo ãgu itamuri mera eropa ta Goãmũ pohro majarã gũa áririre ihmurã iibũ gũa muare. Eropirã diaye muare gũa mahicũ ãarã ãgu pohro majarã gũa áririre masia mũa. ⁷Eropirã õari buherire diaye muare werecũ ãarã, Goãmũ turari mera gũa iicũ ãarã, ãgu pohro majarã gũa áririre masia mũa. Óaripũ áripehreri gũa iira gũa mojo iropã dopa áhrra gũa õaro cãhmotaboro dopa. Iri óarire iirã gũa watĩre cãhmotarã iiaa. Eropirã iri óari gũa iira mera gũa ãgure tarinũgaa. ⁸Eropa iirã gajirã guare umupeoma. Gajirãpũ guare umupeobeama. Gajirã õaro wereniguima guare. Gajirãpũ ñero arĩ wereniguima guare. Diaye gũa werequerẽcũ ta “Gũyarã áhrra,” arĩ weresãma gajirã guare. ⁹Gajinũre guare masirã dopa iima. Gajinũre guare masibirã dopa iima. Guare erã wejẽdiakerẽcũ ta ojocarinia

gua. Erã buriḡã panirã áriquererã ta ojocaria gua. ¹⁰Gua yujuyerinuri bujawererã áriquererã ta, eropa mucubirinigua. Mojomorocurã áriquererã ta erãre òari buherire buherã erãre wuaro doberire gua obodiro dopa ta iirã iiaa erãre. Gajino moorã áriquererã ta, diaye ta Goãmũ yare opapehocãa gua.

¹¹Corinto majarã, yũ acawererã, mũare òaro mera werepeho gojabũ gua mũare. Mũare turaro mahirã eropa werebũ. ¹²Gũapũ mũare mahi duhubirabũ. Mũapũ guare mahibiriñaria. ¹³Eropiḡũ yũ porãre yũ werebodiro dopa ta mũare weregũra: Mũare gua pepidiro dopa ta mũa sã eropa ta òaro pepique gũare. Eropirã gũare mahique mũa.

Cristore umupeobirãre wapicũdorebiriñumi Pablo

¹⁴Eropirã Cristore umupeobirã mera eropa wapicũniguibiricãque. Erã mera majagũ áriḡbita. Yujuro mera áriḡbea mũa. Òarire iigũ, ñerire iigũ mera òaro áriḡmasibeami. Boyoro iro dopa áriḡã Goãmũre gamerã àhriima. Naitiãro iro dopa áriḡã Goãmũre gamebirã àhriima. Eropirã erã perã game wapicũmasibeama. ¹⁵Eropiḡũ Cristo watĩ mera yujuro pepibeami. Eropiḡũ Cristo yagũ, Cristore umupeobiḡũ mera òaro game wapicũmasibeami. ¹⁶Goãmũre umupeori wihigũ goãmãrã wéanirãre mari apicũ queoro wabeaa. Eropa ta Cristo yarã Cristore gamebirã mera wapicũniguicũ queoro wabeaa. Erã pe curu majarã yujuro mera erã áriḡmasibeama. Goãmũ wihi iro dopa àhraa mari. Iḡũ wihi áriḡro dopa ta mari mera àhriima iḡũ. Òpa arĩñumi Goãmũ iḡũ yare erã gojarapũge:

Erã mera ta áriḡũra yũhũ. Eropiḡũ erã watope ta eropa áriḡniguigũra. Yũhũ Goãmũ erã opu áriḡũra. Eropirã erãpũ yaharã masa áriḡrãcoma, arĩñumi iḡũ.

¹⁷Eropiḡũ òpa arĩnemoñumi iḡũ mari Opu:

Erã ñerã mera ne dujabita. Eropirã erãre wapicubita. Yũre gamebirã yare ñerire ne iibiricãque. Eropiḡũ yũpũ mũare wapicũgũra. ¹⁸Eropiḡũ mũa pagũ áriḡũra. Mũapũ yũ porã áriḡrãca, arĩñumi mari Opu turatariagũ.

7 ¹Yũ acawererã, yũ mahirã, mũare ire weregũra: I áriḡpeherrerire Goãmũ marire iḡũ eropa arĩ werecũ iarã áriḡpeherrerire mari dupũre goroweorire duhurã. Eropirã mari pepiri sãre goroweorire duhurã. Eropirã Goãmũre òaro umupeori mera ñero iiro mariro áriḡã mari.

Pablo mucubiriri mera wereñumi Corinto majarãre

²Òaro gũare mahique. Ne merogã mera ñero iibiribũ gua mũare. Eropirã gũa buheri mera mũare ñero iicũ ne iibiribũ gua. Ne yujugũre mũa mera majagũre gũyari mera waja gamebiribũ. ³Eropa arĩḡũ “Dipuwasacurã àhraa mũa,” arĩḡũ iibeaa mũare. Mũare mahia gua. Irire mũare weretuhabũ. Ojocarirã yuju curu ta àhraa mari. Mari sirira puhrũge sãre yuju curu ta áriḡrãca mari. ⁴Òaro mũa iirare masia yũhũ. Eropiḡũ mũare guñabeogũ mucubiria. Eropirã gũa ñero taririsubure mũa òaro iira querere pee buriḡã mucubiribũ yũhũ.

⁵Eropi Macedonia yebague gua ejara pũhrũ, erogue ejarã ne soobiribũ gua. Eroguere ñero taribũ gua. Gajirã gua mera game dũyasoma. Eropirã “Cristo yare duhubocoma,” arĩrã Cristo yarãpũre wũaro guñaricubũ gua. ⁶Gua eropa ñero taricũ Goãmũpũ guare òaro siporãcũcũ iimi. Ìgu marire bũjawererãre mucubiricũ iigu àhrimi. Eropigu Tito gua pohrogue ìgu dujariro mera guare mucubiricũ iimi Goãmũ. ⁷Tito ìgu eracũ ìarã mucubiribũ. Iri dihtare mucubiribiribũ. Mũare ìgu òari quere werecũ sãre turaro mucubiribũ. Yũre mũa ìadiarare weremi guare. Yũre mũa bũjawerera sãre weremi ìgu. Yũre “Goãmũ yare iigu iimi Pablo,” mũa gajirãre arĩ werera sãre weremi ìgu. Ìgu eropa aricũ peegũ turaro mucubiribũ yũhũ.

⁸Ero core yũhũ mũa ñero iirare were gojabeorapũ mera mũare merogã bũjawerecũ iribũ. Eropa iidigu arĩqueregu ta “Iri carta mera ñero iibũ,” arĩbeaa. Iripũre mũa buhera pũhrũ bũjawereyoro mũa. Eropigu ne gojabeora pũhrũ ta “¿Ñero iari yũhũ?” arĩ pepiribũ. Eropa arĩqueregu ta “Ñero iibũ,” arĩbeaa dohpaguere. ⁹Dohpague tamerare mucubiria yũhũ. Mũa bũjawererare peegũ mucubiribeeaa. Mũa bũjawererã òaripũre gohrotorapũre peegũ mucubiria yũhũ. Mũa ñero iirare bũjawerecũ ìagu Goãmũpũ mũare òarire gohrotocũ iidi arĩmi. Eropirã mũare bũjawerecũ iirã ñero ii goroweorã iibiribũ gua mũare. ¹⁰Eropirã Goãmũ ìgu gamero dopa ta bũjawererã, mari ñerire bũjawere òaripũre gohrotorãca. Eropa ta mari bũjawerecũ ìagu mari peamegue wabonirãre taumi Goãmũ. Eropiro mari eropa bũjawerecũ òha àhraa marire. Cristore gamebirãpũ erã bũjawerequererã erã ñerire duhubirã peamegue wamorã arĩnima. ¹¹Mũapũ Goãmũ ìgu gamero dopa ta bũjawereayoro. Mũa eropa bũjawererã òpa iirã waĩcuabũ mũa: Dohpague ñerire iirãre eropa ìacãbirã waĩcuabũ mũa. Ne iri ñerire gamebirigohracãyoro mũa. Erã ñeri iira mera guayoro. Erãre ñerire iirire duhdorerã waĩcuabũ mũa. Eropirã erã ñerire giirã waĩcuabũ mũa erã iro dopa iiri arĩrã. Eropirã yũre mahirã yũre ìadiayoro mũa. Eropirã ñeri iigũre dipuwaja moayoro. Iri arĩpehrerire mũa iira mera iri ñeri dipuwaja marirã mũa arĩrĩre ìhmuabũ mũa guare. ¹²Iribojegue ñero iigũre mũare were gojabeoqueregu ta ìgũre itamubu eropa arĩ gojabeobiribũ yũhũ. Ìgu ñero iidigu sãre itamubu eropa arĩ gojabeobiribũ. Mũapũre itamubu iripũre gojabeobũ. Goãmũ ìgu ìhurore guare òaro umupeoa mũa. Irire mũa umupeorare mũa òaro gunãboro dopa iripũre gojabeobũ mũare. ¹³Eropirã Tito mũa iira quere guare werecũ peerã bũrigã mucubiria gua.

Tito sã mũa mera turaro mucubiricũ ìha gua sã mucubiribũ. Ìgũre mũa òaro mera bocatĩricũ peerã, mũa mera ìgu mucubirirare peerã, gua sã òaro mucubiribũ. ¹⁴Negohraguere mũa pohro ìgu waboro corere mũa mera yũ mucubirirare, òarã mũa arĩrãre werebũ ìgũre. Eropirã yũ arĩdiro dopa ta òaro iiaayoro mũa ìgũre. Eropigu ìgũre yũ arĩrãre guhyasĩribirabũ. Titore mũare gua werera diaye ta arĩbũ dohpaguere ìgu ìadiro dopa ta. ¹⁵Mũa pohrogue ìgu ejacũ umupeori mera bocatĩriayoro mũa. Eropirã guhyadiaro mera ìarã tarinũgaro mariro mũa yũhrirã arĩcũ ìapũ ìgu. Eropigu mũare mahinemogu

iimi ĩgu. ¹⁶Dohpaguere ôaro yũhrirã Goãmũ ĩgu gamero dopa ta mũa ôaro mũa iipehorã áricũ ôaro masia yũhũ. Eropa masigu burigã mucubiria.

Cristo yarã árirã gajirãre eropa ocãro gahmea marire, arĩ gojañumi Pablo

8 ¹Gũa acawererã, ire mũare masicũ gahmea gũa. Cristo yarã Macedonia yeba majarã Goãmũ mahiri mera ĩgu mojomoro ĩari mera erã iirare mũare weregura. ²Erã ñero tariquererã ta, niyeru moorã áriquererã ta mahiro mariro eropa ocãma gajirãre. Cristo mera turaro mucubirã árirã, erã gajirãre ôaro mera erã oparire eropa ocãma. ³Mũare arĩgu iiaa. Erã erã oparopẽ orã, tauñariro oma. Erã gamero oma erã. ⁴Goãmũ yarãre mojomorocũrãre turaro itamudiarã, erãre erã obeorire aĩdorema gũare. ⁵“Ipẽ orãcoma erã,” arĩ gũa pepidiro tauro oma erã. Ôpa iima erã: Negohraguere niyerure erã oboro core mari Opũ ĩgu gamerire iidiarã árituhama. Eropirã Goãmũ ĩgu gamero dopa ta gũa sãre umupeori mera yũhrinirã árima. Eropa iirã árirã erã niyeru sãre oma. ⁶Erã eropa ocũ ĩarã Titore gũarũ ôpa arĩbũ: “Erãre mũ buhenugadiro dopa ta Corinto majarã sãre erã mojomorocũrãre oburire wereque,” arĩbũ gũa ĩgũre. Mũa sã gajirãre mojomoro ĩarã mũa itamuboro dopa eropa arĩbũ ĩgũre. ⁷Eropirã mũarũ áripehrerire ôaro iirã árituhaa. Cristore diaye ta ôaro umupeoa mũa. Eropirã ĩgu yare ôaro werea. Eropirã Goãmũ yare ôaro masia mũa. Eropirã Goãmũ ĩgu gamero dopa ta turaro iidiaa. Eropirã gũare mahia mũa. Eropa ta ôaro iirã árituhaa mũa. Mũa eropa ôaro iirã áriquerẽcũ ta merogã dũhyania mũa iipehoburi. Mojomorocũrã tamerare mũa mojomoro ĩacũ gahmea gũa. Eropirã erãre mũa ôaro mera wũaro ocũ gahmea gũa.

⁸Eropa arĩgu mũare doregohragũ iibea yũhũ. Eropa arĩ weregũ iiaa mũare. Gajirã mojomorocũrãre erã turaro itamurare mũare weregũ iiaa. ¿Mũa diaye ta gajirãre mojomoro ĩhari? arĩ masidiagu iiaa. ⁹Mari Opũ Jesucristopũ marire ĩgu mojomoro ĩarare masia mũa. Iri diaye ta áhrea. ĩgu ũmaroguere wũaro opagũ áriquerẽgu ta i yebaguere arigu mojomorocũro warũ. Eropigu mũa ya áriburire sirigu sã mojomorocũro warũ. Ôpa ta warũ mũarũ mũa wũaro opaboro dopa, ĩgu mera mũa ôaro áriniguiçaborore.

¹⁰Mũare weregũ iiaa. Ôpa pepia yũrũ: Yũju bojori wahaa mũa mojomorocũrãre odiara pũhrũ. Mũarũ mojomorocũrãre odiamũhtaribũ. Eropirã erãre omũhtabonirã áribũ mũa. ¹¹Eropirã mũa odiarare dohpaguere oho ojogorocũque. Mũa odiamũhtadiro dopa ta dohpaguere ôaro opehoque. Eropirã pagari oparã árirã wũaro oque. Merogã oparã árirã merogã oque. ¹²Bũrigã mũa odiari mera irire mũa orare Goãmũ mucubirigũcumĩ. Eropirã ôaro mũa omasiopẽ oque. Mũa oropẽ ta mucubirigũcumĩ. Mũa opabirirare mũa ocũ gamebeamĩ ĩgu.

¹³“Mojomorocũrãre oque,” arĩgu erãre wũaro opadoregũ iibea. Eropigu mũarũre mojomorocũrã dujacũ iidiaabea. ¹⁴Mũare yũjuro mera opadoregũ eropa arĩgu iiaa. Dohpaguere mũarũ wũaro opaa. Eropa oparã gajinore moorãre omasia mũa. Pũhrũ mũare gajino moocũ erã sã mũare omasima. Mũa eropa game orã yũjuropa oparãca áripehrerã Cristo yarã. ¹⁵Eropa ta

ãhrra Goãmũ yare erã gojarapũ: “Wũaro aĩgu sã gajigu tauro opabeami. Merogã aĩgu sãre ne merogã dũhyabeaa,” arãa Goãmũ yare erã gojarapũ.

Tito ĩgu mera majarã mera Corintogue wañumi

¹⁶Eropi mũare yũ itamudiro dopa ta Tito sã mũare itamudiami. Goãmũpũ ĩgu itamudiacũ iimi ĩgũre. ĩgu eropa iicũ ĩagu “Õhaa,” arãa Goãmũre. ¹⁷Titore gũa mũa pohrogue wadorecũ ĩgu õaro mera yũhriami. Eropigu ĩgũre mũa pohrogue gũa wadoreboro coregue ta mũa pohroguere “Wagũra,” arĩ guñatuhadi ãhrami ĩgu.

¹⁸Ĩgu gajigu Jesu yagu mera wapimoa obeobũ gũa. Tito mera majagu áripehrrerã gajirã Jesu yarã erã umupeogu ãhrimi. Õari buherire õaro ĩgu mohmegũ áricũ ĩarã ĩgũre õaro umupeoma. ¹⁹Eropirã Jesu yarã ĩgũre ta gahmeama gũa mera curibure. Iri niyerure mojomorocũrã pohrogue gũa aicũ gũa mera curibure gahmeama ĩgũre. Iri niyerure mũa gameneorare gũa mojomorocũrãre orã wacũ ĩarã mojomorocũrãpũ “Marire mari Opũ itamugu iimi,” arĩrãcoma. Gũa eropa ocũ, erãre bũrigã mari itamudiarare masirãcoma. ²⁰Eropirã i niyerure wũaro Jesu yarã erã odorere gũa aĩrã õaro ĩhadiburãca erã orare gũare weresãri arĩrã. ²¹Mari Opũ ĩgu ĩhabeoro diaye õaro iidiaa gũa. Eropirã masa erã ĩhuro sãre õaro iidiaa.

²²Eropa iimorã gajigũre mari acaweregũre obeorãca Tito sã mera. Gũa ĩgu mera obeogũre bajasuburi gajirãre ĩgu õaro itamucũ ĩabu gũa. Eropigu dohpaguere mũapũ gajirãre mũa itamudiacũ ĩagu ero core ĩgu iidiro tauro õaro mũare itamudiami. ²³Tito sãre mũare weregũra. ĩgu yũ mera majagu ãhrimi. Mũare yũ itamucũ ĩgu yũ mera mohmegũ ãhrimi. Gajirã ĩgu mera wamorã Jesu yarã erã beyenirã erã obeorã ãhriima. Erã Cristo yare iima gajirã Cristore erã umupeoboro dopa. ²⁴Erã eropa árirãre mahiri mera õaro erãre bocatĩrique mũa. Mũa eropa iicũ ĩarã gajirã Jesu yarãpũ õarã mũa áricũre masirãcoma. Mari obeonirãre “Õaro mera bocatĩrãcoma Corinto majarã,” arĩ weretuhabu gũa mera majarãre. Mũa eropa õaro bocatĩricũ ĩarã gũa werera diaye áricũ ĩha masirãcoma gajirã Jesu yarã.

Jesu yarãre mojomorocũrãre erã oburire wereñumi Pablo

9 ¹Eropirã Goãmũ yarãre mũa itamubore mũa oburire masituhaa mũa. ²Gajirãre mũa itamudiarire masia yũ sã. Eropa masigu Macedonia majarãre õpa arĩ werebũ: “Corinto majarã Jesu yarãpũ gajirãre itamudiatuhama. Yuju bojori taria erã itamudiaturo,” arĩ weretuhabũ erãre mũare. Mũa eropa itamudiacũ peerã bajarã erã sã mojomorocũrãre itamudiamaa. ³Mũa mojomorocũrãre oborare gajirãre werequeregũ “Iri niyerure gameneobiribocomaa yũ ejaboro core,” arĩ pepia mũare. Eropigu dohpaguere oãre mari acawererãre mũa pohrogue obeomũtagũ iiaa. Mojomorocũrãre mũa oburire gameneo mũa opayuboro dopa oãre obeomũtagũ iiaa. ⁴Erãre obeobigu Macedonia yeba majarã mera mũa pohrogue yũ ejagu, mũa oburire mũa opabiricũ ĩagu gũhyasĩrisãboya yũhũ mũare. “Mojomorocũrãre orãcoma,”

yuhũ mũare arĩra puhũ mũa obiricũ ãagũ gũhyasĩrisãboya yuhũ mũare. Mũa sã gũhyasĩriboya. ⁵Eropigũ mũa pohrogue yũ ejaboro core erãre mari acawererãre obeomũhtagũ iiaa. “Mojomorocũrãre wũaro orãca,” mũa arĩrare mũa opayuboro dopa erãre obeomũhtagũ iiaa. Mũa oburire mũa gameneocũ erãpũ mũare weresererãcoma. Eropigũ yũpũ eja mũa oburire mũa opayutuhacũ ãha mucubiriri mera mũa odiarare masigũra. Mũare gũa odorera arĩsome iri.

⁶Eropirã ire guñaque mũa: Bajameyerigã otedigũ bajamegã dũcare aĩgũcumi. Bajayeri otedigũ baja dũca Eropigũ mũa pohrogue yũ ejaboro core erãre mari acawererãre obeomũhtagũ iiaa. “Mojomorocũrãre wũaro orre aĩgũcumi. Eropa ta ãhrraa mojomorocũrãre mari ocũ. Merogã mari ocũ, Goãmũ merogã ogũcumi marire. Wũaro mari ocũ wũaro marire ogũcumi. ⁷Eropirã yujurãyeri mũa “Ipẽ ogũra,” arĩ oque. Mahĩnari obiricãque. “Marire odoreama,” arĩro mariro oque. Mucubiriri mera orãre gahmemi Goãmũ. ⁸ĩgũpũ mũa gameri tauro mũare ogũcumi. Eropirã arĩpehrerire mũa gameri dũhyarire opapehorãca. Eropirã gajirãre mũa oburi sã õaro sihajaroca mũa opari. ⁹Eropa ta ãhrraa Goãmũ yare erã gojarapũ:

Mojomorocũrãre wũaro ohomi ãgũ. Õaro mera masare itamuniguimi ãgũ, ãhrraa ãgũ yare erã gojarapũ.

¹⁰Eropiro oteri dũcacũra puhũ oteri masũ ãgũ oteburi coyere ohomi Goãmũ. Puhũ ãgũ oterare dũcacũcũ iimi ãgũ baburire. Mojomorocũrãre mũa wũaro ocũ oteri masũre ãgũ coyere oro dopa ta mũa sãre wũaro ogũcumi Goãmũ. Eropa ta mũare ogũcumi mojomorocũrãre mũa onemoboro dopa. ¹¹Eropa ta ãhrraa. Wũaro ogũcumi gajirãre wũaro mũa eropa oniguicãboro dopa. Eropirã mũa iri niyerure odorere gũa ocũ erã ñearãpũ mucubiriri mera Goãmũre “Õhaa,” arĩrãcoma. ¹²Eropirã mojomorocũrãre Goãmũ yarãre orã, erãre itamurã iiaa mũa. I dihtare iibea mũa. I sãre iirã iiaa mũa. Mũa eropa orã bajarã masa Goãmũre mucubiriri mera “Õhaa,” arĩcũ iirãca mũa. ¹³Eropa mũa gajirãre itamucũ ãarã, Goãmũre umupeori mera wereniguirãcoma masa. Eropirã erãre gajirã sãre wũaro mũa ocũ ãarã Goãmũre “Õatariagũ ãhrimi,” arĩrãcoma masa. Eropa arĩrãcoma Cristo ya buherire õari buherire mũa õaro yuhricũ ãarã. ¹⁴Eropirã Goãmũ ãgũ mojomoro ãadiro dopa ta mũa sã erãre mojomoro ãacũ erãpũ mũare gamerãcoma. Eropa gamerã mũare serẽbasarãcoma Goãmũre. ¹⁵Goãmũ marire õatariaro iigũcumi. ãgũ eropa iiborore masirã “Õataria,” arãa mari ãgũre.

Jesu ãgũ apidigũ ãgũ arĩrĩre wereñumi Pablo

10 ¹Dohpaguere yuhũ Pablo mũare weregũra. Cristopũ ne guabigũ, masare õaro iigũ arĩñumi. ãgũ iidiro dopa ta yũ sã mũare werediaa õari mera. Yujurãyeri mũa mera majarã õpa arãyoro yũre. “Mari mera arĩgũ eropa pepicãgũ bu arĩgũ iro dopa arĩmi Pablo. Eropa arĩqueregũ ta gajipũgue arĩgũ marire doyarõ mariro turibeomi,” arãyoro mũa yujurãyeri yũre. ²Eropigũ mũare ire burigã dorea: Mũa pohrogue yũ ejacũ õaro iique mũa, “¿Pablo gũare turiri?” arĩrã. Yujurãyeri yũre õpa arãyoro: “ãgũ, ãgũ gamero, Goãmũ dorebiriquerecũ

iimi,” arāyoro m̄ua ȳure yujurāyeri. Eropa arīrā tamerare turiboca ȳuh̄u. ³Ḡua s̄a i yeba majarā ta arīrā iiaa. Eropa arīquererā ta i yeba majarā erā gamero iiro dopa ta iibea ḡua. ⁴Surara erā tarinūgaro dopa ta ḡuap̄u ñerire tarinūgadiaa. Surara erā mojo oparo dopa ta ḡua s̄a mojo opaa. Ḡua mojo i yeba majarā erā masiri, erā wereniguitarinūgari, erā turari arībeaa. Ḡua mojo Goām̄u ya turarip̄u āhraa. Iri turari mera masa Goām̄ure erā umupeodorebirirare duhucū iiaa ḡua. Eropirā erā gamero erā masirire iri duhpiburi arībiricū masicū iiaa ḡua iri turari mera. ⁵Eropirā arīpehrerā erā gamero pepirare Goām̄ure erā masidorebirirare duhucū iiaa ḡua. Eropirā iri turari mera Goām̄ure gamebirāre Cristore ōaro ȳuhrirā erā arīcū iiaa ḡua. Cristo īḡu gamero dopa ta erāre pepicū iiaa ḡua. ⁶Eropirā gajirā m̄ua mera majarā Cristore tarinūgacū īarā erāre dipuwaja moamorā arīrāca ḡua. M̄ua ōaro ȳuhrira p̄uh̄ru Cristore tarinūgarāp̄ure eropa dipuwaja moamorā arīrāca ḡua.

⁷Ȳu arīricuri dihtare masia m̄ua. Ȳu pepirip̄ure ne masibea m̄ua. “Cristo yarā āhraa,” arīrā arīrā ōpa masique m̄ua: Ḡua s̄a m̄ua iro dopa ta Cristo yarā ta āhraa. ⁸“Mari Op̄u ya buherire ōari buherire buhedoreḡu apimi ḡuare,” arīḡu bajasuburi m̄uare iri dihtare eropa arī werequereḡu ta ḡuhyasīrībeaa ȳuh̄u. Ḡuare eropa buhedoreḡu m̄uare itamumorāre apimi ḡuare. M̄uare goroweomorāre apiḡu iibirimi ḡuare. ⁹I ȳu gojabeorip̄ure m̄ua īha ucacū gamebeaa ȳuh̄u. ¹⁰Yujurāyeri m̄ua mera majarā ōpa arāyoro: “Pablo gojabeoḡu p̄uriro dihta gojabeomi marire. Eropa arīquereḡu ta mari mera arīḡu eropa arīcāḡu āhrimi. Bu arīḡu iro dopa āhrimi. Eropiro īḡu marire wereniguiro duhpiburi arībeaa,” arāyoro m̄ua yujurāyeri. ¹¹Eropa arīrāre ōpa arī wereḡura: M̄ua arīdiro dopa ta iibea ḡua. M̄uare ḡua arī gojabeodiro dopa ta eropa ta arī wererāca m̄ua pohro arīrā. Eropirā “Ōpa iirāca,” ḡua arī gojabeodiro dopa ta eropa ta iirāca m̄ua pohro arīrā s̄a.

¹²Yujurāyeri m̄ua mera majarā “Ōaro masipehorā āhraa ḡua,” arī wereniguimaacāma erā basi. Erā game īha bocatīrīrā “Marip̄u ōatariarā āhraa,” arīma erā. Eropa arīmaacārā “¿Gajirā ōarā iro dopa āhriri mari?” arībeama erā basi. Ḡuap̄u erā iro dopa iisome. ¹³Goām̄u ḡuare īḡu buhedore īḡu apira dihtare werea ḡuap̄u m̄uare. Gajirā erā mohmerare “Iib̄u ḡuap̄u,” arīrā iibea. Goām̄u m̄ua s̄are buhedoreḡu ḡuare apimi. ¹⁴Eroparīrā ḡuyarā iibea ḡua. Ōari buherire Cristo yare m̄uare buhem̄htarā ta ejab̄u ḡua. Eropirā Goām̄u ḡuare buhedore īḡu apira dihtare wererā iiaa m̄uare. ¹⁵Eropirā gajirā m̄uare itamucū īha “Ḡuap̄u irire iib̄u,” ne arībeaa ḡua. Cristore m̄ua umupeonemocū iiburip̄ure gahmea ḡua. Eropa gamerā m̄uare buhenemodiaa ḡua. Eropa ḡua buherā Goām̄u īḡu apirañe p̄eta buhedīaa ḡua m̄uare. ¹⁶Eropa buhedīaa m̄ua ya yeba core majarāre ōari buherire peebirāre ōari buherire wererā waboro dopa. Eropa warā gajirā erā buhera p̄uh̄ru ejarā, “Ḡuap̄u erāre buhem̄htab̄u,” arīsome ḡua.

¹⁷Goām̄u yare gojarap̄ugue ōpa āhraa: “Mari iirire īarā mucubiribiricāro gahmea. Mari Op̄u īḡu iirip̄ure īarā mucubiro gahmea. Irip̄ure gajirāre werero gahmea,” arī gojara āhraa. ¹⁸Masa erā basi

“Gwaru iiabũ,” erã arĩcũ ĩha mucubiribeami Goãmũ. Mari Opũ Cristo Goãmũre “Oã òaro iima,” ĩgu arĩrãpũre suami Goãmũ.

“Jesu ĩgu apinirã àhraa gua,” arĩ gũyarãre wereñumi Pablo

11 ¹Yũ basi yũ áricũrire weregu pee masibigu iro dopa weregu iiaa, arĩ pepia. Yũ áricũrire mũare weregu guhyasĩrĩñaria. Yũ eropa arĩ werecũ peenique mũa yũre dohpaguere. ²Goãmũ mũare ĩgu mahiro dopa ta turaro mahia yũ sã mũare. Nómeo gajigu mũũ mera igo ñero iibigo igo yujugũre ta gamedigo iro dopa mũa Cristo dihtare gamecũ gamerabu yũhũ mũare. ³Eropa gamequeregu “Erã Cristo yare cóãbocoma,” arĩ guñaricũa mũare. Gajirã ñerã mũare gũyarã, gajiropa arĩri buherire gamecũ iibocoma mũare. Pĩru ĩgu masiri mera Evare gũyacũ igo Goãmũre tarinũgañumo iribojegũere. ĩgu eropa iidiro dopa ta dohpaguere ñerã mũare gũyarã, Cristore mũa òaro umupeorire goroweobocoma. Eropigu mũare giĩsãa. ⁴Erã gua mũare buhediro dopa ta buhebiriquerecũ mũa peeraa. Eropirã erã “Ōpa áridi árimĩ Jesu,” erã gamero gajiropa arĩ werequerecũ ta peea mũa. Watĩ ĩgu pepiro dopa arĩ erã werequerecũ ta peea mũa. Mũare gua weregu Espĩritu Santo gohra àhrimi. ĩgũpũre erã werebiriquerecũ ta mũare gũya buherãre peea mũa. Erã gajiropa áriri buherire erã buhecũ òari buherire erã buhebiriquerecũ ta irire peea mũa. ⁵Erã “Jesu ĩgu apinirã àhraa,” arĩnirã yũre masitarinũgabeama. “Erãre doca merebeaa,” arĩ pepia yũhũ. ⁶Ōaro weretarinũgagu arĩbiriboca yũhũ. Ōaro weretarinũgabiriqueregu Goãmũ yare òaro masia. Yũ eropa masirire bajasuburi mũare masicũ iibũ.

⁷Ōari buherire Goãmũ yare mũare buhegu ne waja gamebiribũ. Mũare itamudiagu waja gamebiribũ. Bu árigũ iro dopa áribũ yũhũ. ¿Yũ eropa waja gamebircũ òabeari mũa pepicũ? ⁸Mũare yũ buhecũ gajĩ macari majarã Jesu yarã yũre itamuma. Erã eropa orare ñeabu mũare itamubu. Mũa yũre oborare erãpũ yũre oma. ⁹Mũa mera árigũ gajino yũre duhyaquerecũ ta mũare niyerure ne serëbiribũ. Mari acawererã Macedonia yeba majarã Jesu yarã áripehrerã yũ gamerare aĩ erama yũre. Iribojegũere mũare ne garibobiribũ yũhũ. Pũhrũgue sãre mũare ne garibosome. ¹⁰Cristo diaye ĩgu werediro dopa ta yũ sã mũare dohpaguere diaye weregu iiaa. Áripehrero Acaya yeba áriřãre i mũare yũ serëbirirare eropa wereniguigũra. ¹¹¿Mũare yũ serëbirirare gajirãre yũ eropa wereniguicũ peerã dohpa pepiri mũa? “Pablo gũare eropa arĩ weregu gũare umupeobigu iimi,” ¿arĩ pepiri mũa? Áribeaa. Mũare umupeoa. Goãmũ irire masimi.

¹²Waja mariro yũ mũare buhenũgadiro dopa ta buhe ojogorocũgũra. “Jesu ĩgu apinirã àhraa,” arĩ gũyanirãre yũre tarinũgacũ iibiriboro dopa waja mariro buheniguigũra. Erãpũ “Gua sã Pablo iro dopa Jesu yare buherã àhraa,” arĩma. Eropa áribeama. Yũpũ waja mariro buhea. Erãpũ waja gamerã buhema. ¹³Erã diaye ta Jesu ĩgu apinirã gohra áribeama. Erãre ne apibiriñumi ĩgu. “Jesu ĩgu apinirã àhraa,” arĩ gũyarã gua iro dopa áriřima erã. ¹⁴Erã eropa iicũ ĩagu ĩhamariabeaa yũhũ. Satana sã anyu Goãmũ yagu òagu iro dopa dehyoacumi

masare. ¹⁵Eropigu erã Satanare itamurã õarã Goãmure itamurã iro dopa erã iicũ ïagu, ïhamaria wabeaa yũhũ. Dohpaguere erã eropa iiquerecũ ta pehrerinu áricũ áripehreri erã ñero iira dipuwaja dipuwaja moagucumi Goãmũ erãre.

Ïgu ñero tarirare wereñumi Pablo

¹⁶Dipaturi muare ire weregura. Ne “Pee masibigu áhrimi,” yũre arĩbiricãque. Yũ eropa arĩdorebiriqerẽcũ ta yũre mua eropa arĩ pepicũ õaroca yũre. “Pee masibigu áhrimi,” arĩ yũre pepiquerẽ ta peenique mua yũre. Merogã yũ áriřicũrire yũ basi werecũ peenique mua. ¹⁷Muare eropa weregu guhyasĩriñaria yũhũ. Pee masibigu iro dopa iigu iiaa, arĩ pepia. Mari Opũ Jesu yũre irire “Eropa wereque,” arĩbirimi. ¹⁸Ïgu eropa arĩbiriqerẽcũ ta ire weregura muare. Erã gamero “Õarã áhrra,” arĩmaacãrã erã áricũ ïagu yũ sã yũ áriřicũrire muare weregura. ¹⁹Muarũ eropa arĩmaacãrãre peerã mucubiriri mera ihaa mua erãre. ¿Õaro masirã áhriri muarũ eropa peerã? ²⁰Muare erã pohro majarã moacũ, mua yare erã emacũ eropa ïacãa mua. Eropirã muare erã docapicũ mua wayuporãre erã pacũ eropa pepicãa mua. ²¹¿Opĩricãri muare erã eropiicũ? Cue, ¿turatariarã áhriri erã? Guarũ erã iro dopa turarã áribeaa. Eropirã erã iro dopa ñerire iibea.

Erã iro dopa áriřiriqerẽgu ta erã “Õpa áriřã áhrra,” erã aricũ peegu yũ sã eropa arĩ wereboca. Dipaturi guhyasĩriqerẽgu ta õpa arĩgura muare. ²²Erã “Hebreo masa áhrra,” arĩma gajirãre tarinũgadiarã. Hebreo masũ ta áhrra yũ sã. “Israe masa mari Pagũ ïgu beyenirã áhrra,” arĩma daja erã. Erã iro dopa ta ïgu beyedigũ ta áhrra yũ sã. “Abrahã pãramerã áhrra,” arĩma daja erã gajirãre tarinũgadiarã. Erã iro dopa ta Abrahã pãrami ta áhrra yũ sã. ²³“Cristo yare itamurã áhrra,” arĩma daja erã. Yũ sã Cristo yare itamugũ ta áhrra. Erã tauro Cristo yare õaro iiaa yũhũ. Eropa yũ basi arĩ wereniguigu guhyasĩriñaria yũhũ. Pee masibigu iro dopa wereniguigu iiaa, arĩ pepia yũ basi. Erã tauro mohmebũ yũhũ Cristo yare iigu. Bajasuburi erã tauro Cristo yagu yũ áriři dipuwaja peresu iima yũre gajirã. Erã tauro bajasuburi tãrama masa yũre. Erã tauro Cristo yare yũ iira dipuwaja masa yũre wejẽdiarima. Eropigu merogã mera taribũ yũ sĩribodirore. ²⁴Cinco suburi judio masa yũre ñeama. Yũre erã ñeari nucũ suburi treinta y nueve suburi yũre tãrama. ²⁵Uhresubu gajirã yũre ñeama. Eropa ñearã erã tamera yũre ñero yucũgu mera pama. Gajisubu yũre gajirã utã mera deama. Uhresubu dohodiru mera utãyegue mehtuhaja miribũ. Eropigu yujunũ, yuju ñami taboamiji wecague wũariya decoguere baa payabũ. ²⁶Bajasuburi macariguere buhe curigu ejabũ. Yũ eropa buhe curicũ guhyatariacãbũ yũre. Yũre mirimaja guhya áriřũ. Yũre yajamaja guhya áriřũ. Yaha yeba majarã judio masa, judio masa áriřirã sã yũre ñero iimaja guhya áriřũ. Macarigue, masa marirogue, wũariyague sãre yũre sĩrimaja guhya áriřũ. “Mũ mera majarã áhrra,” arĩ guyarã sã yũre ñero iimaja guhya áriřũ. ²⁷Cristo yare iibu burigã mohmebũ. Eropa mohmegũ ñero wabũ. Bajasuburi wũja yũre ñero pũriqerẽcũ ta eropa mohmeniguicãmũribũ. Ñero oaboamũribũ. Eropiro yũre ñemesibumũribũ. Bajasuburi barire bocabirimũribũ. Yũhũ yũsaro sãre pepimũribũ. Suhri sañaburi sã ne marimũribũ yũre.

²⁸Eropa ñero tarigu ta umuri nucu gajirã Cristo yarãre, mua sãre buriã guãaa. ²⁹Eropigu Cristo yagu igu turabiricũ ñagu bujawerea yuhu. Gajirã Cristo yagure ñero iidorebocoma. Erã eropa iicũ ñagu Cristo yagure guhyasirisãgu, erã ñero iidorerã mera guaa yuhu. ³⁰Werediabiriqueregu ta yu ariricure weregũ, yuhu turabigu yu aririre mua masiboro dopa muare weregura. ³¹Goãmu mari Opũ Jesu Pagu umuri nucu mari umupeobu igu ta muare yu guyabiricũ masimi. Ire muare diaye weregura. ³²Damasco waicuri macague yuhu Jesucristo yare buhecũ ñagu aripehrerã masa tauro opu Areta waicugu igu doca arigu opu yure ñeadiaripu. Eropa ñeadiagu iri maca maja sãriro disiporori nucu surarare coredereripu. ³³Erã eropa corero watope ta yu mera majarã wuuri puibugue yure duhusã iri sãriro purupugue yuju gobegue yure duhu dijuma. Erã eropa duhu dijura puhru duhrigã wabu.

Cristo igure ihmurare wereñumi Pablo

12 ¹Yu ariricure mucubiriri mera yu wercũ duhpiburi aribeaa. Duhpiburi aribiriquerecũ ta werenemogura muare. Mari Opũ Jesu igu yure ihmurare igu yure masicũ iirare weregura muare. ²Ōpa ihmunugami igu yure: Catorce bojori gohra waha yure Cristo yagure umarogue igu aĩ muriara puhru. Umarogue necã wecague yure aĩ muriami. Yu siporã dihtare igu aigãcũ masibea yuhu. O yu dupũ sãre igu aigãcũ sãre ne masibea yuhu. Goãmu dihta irire masimi. ³⁻⁴Eropigu paraíso waicurogue yure aĩ mrijami. Irire masia yuhu. Yu siporã dihtare igu aigãcũ masibea yuhu. O yu dupũ sãre igu aigãcũ masibirica. Goãmu dihta irire masimi. Igu eropa aĩ mriacũ ejagu eroguere igu wererire peebu. Iri yu peerare masa ne masibeama. Iri wererire gajirãre weredebirimi yure. ⁵Eroguere igu yure eropa wererare muare weregũ, “Yuhu yujugu ta gajirãre tarinugagu ahraa,” ariboya yuhu. Eropigu irire werebeaa yuhu. Yu masibirira dihtare yu turabirira dihtare mucubirigu muare weregura. ⁶“Gajirãre tarinugaa yuhu,” muare arĩ werediacũ yu arĩra diaye arĩboca. Eropigu eropa arĩ weregũ eropa arĩmaacãbiriboya yuhu. Eropa arĩbiriqueregu ta “Ōpa gajirãre tarinugaa,” arĩ weresome yuhu muare, guhyadiaro yure ihari arigu. Yu arĩro tauro mua yure umupeocũ gamebeaa. ⁷Cristo oatararire umaroguere igu yure ihmucũ ñadigu arigu, “Gajirãre tarinugaa yuhu,” arĩboca yurũ. Eropa yu arĩbiriboro dopa Satana igu yure dore moacũ ñagu “Ōaroca,” arĩ apidi arĩmi Goãmu. Eropigu yu ñero tariboro dopa yure dore moadi arĩmi Satana. Iri dore poraru ñajaro dopa ta yure puribu. ⁸Iri dore yure taridoregu serẽmuriribu mari Opure. Uhresubu serẽribu. ⁹Yu eropa serẽquerecũ ta i dore tamerare yure taricũ iibirimi igu. Ōpa arĩ yure yuhrimurimi igu: “Mure mahia. Yu mahiri mera õaro ariguca mũhu. Püriniguicãsũgu, turabigu arigu yu turarire õaro ihmuguca mũhu. Turarã tauro mũhu yu turarire masare masicũ iiguca,” arĩ yuhrimurimi Goãmu yure. Igu eroparicũ peegu turabigu yu arĩrãre masigu mucubiria. Eropigu yu turabirirare masare mucubiriri mera weregura. Eropa arĩ weregũca Cristo igu

turari pure yuhũ gajirãre ðaro masicũ iiboro dopa. ¹⁰Eropigu Cristo yagu yu áriiri dipuwaja yure pũriro áriquerẽcũ ta, gajirã ñero yure wereniguiquerẽcũ ta, ñetariaro tariquerẽgu ta, yure erã ñero erã iiniguiquerẽcũ ta, yure bujawerẽcũ erã iiquerẽcũ ta mucubiria yuhũ. Eropa ñero tariquerẽgu ta, eropa turabigu áriquerẽgu ta Cristo turari mera bocatiua ñgure guñaturagu. Eropigu mucubiria.

Corinto majarãre Cristo yarãre wuaro guñaricũnumi Pablo

¹¹Yu áriircũire yu basi weregu gũhyasĩriñaria yuhũ. Pee masibigu iro dopa weregu iiaa, arĩ pepia yuhũ. Yu eropa werequerẽcũ ta iri mua ya dipuwaja ãhraa. Mũapũ yu áriircũire gajirãre ðaro werẽcũ yu basi werebiriboaya. Yuhũ bu áriũgũ áriquerẽgu ta “Jesu ñgu apinirã ãhraa,” arĩ gũyarãre doca merebeaa yuhũ. ¹²Diaye ta ñero tarigu áriquerẽgu mũare Goãmũ turari mera deyoro moarire ii ñhmuribũ. Eropa ii ñhmugũ Cristo ñgu apidigu yu áriĩre ñhmugũ iiribũ mũare. ¹³Gaji macari majarãre Jesu yarãre mua sãre yujuro mera ñhmuribũ yuhũ. Mũapũre gajiroa ñari iiribũ. Mũa dihtare garibobiriribũ. Mũa dihtare gajinore yaha áriĩburire serẽbiriribũ. ¿Yuhũ mũare itamurire serẽbiricũ ñehe áriiri mũare? Iri ñeri áricũ irire cãdijique mua yure.

¹⁴Ire peeque mua. Pesubu mua pohrogue yu ejara pũhrũ dipaturi wadiaa daja. Erogue ejaqu mũare garibosome yuhũ. Gajinore serẽsome yuhũ mũare. Mũa yare gamebeaa yuhũ. Cristo yapũre mua yũhrirã áricũ gahmea yuhũ. Masa porãpũ erã pagũ sumarãre erã gamerire obeama. Erã pagũ sumarãpũ erã porã gamerire ohoma. Eropa ta mua yu porã iro dopa áriirã yu gameripũre osome mua. ¹⁵Eropigu yu tamera yu oparipũre odiaa mũare itamubu. Mũa pohro majagu iro dopa áriidiaa mũare itamubu. Mũare yu turaro mahiquerẽcũ ta mũapũ yure daberogã mahia yu pepicũ.

¹⁶Eropigu mua mera áriũgũ mũare garibobiribũ. ¿Eropa ta iiri yuhũ mua pepicũ? Eropa iiquerẽcũ ta yujurãyeri mua mera majarã õpa arĩrãcoma: “Pablo gajinore marire aidiagu gũyami,” arĩrãcoma. ¹⁷¿Erã arĩro dopa ta iigu áriũgũ dohpa irire iiboyuri yuhũ? ¿Mũa pohrogue yu obeonirã ñehenore yure gũyabasayuri erã mũare mua ñacũ? ¹⁸Sohõ áriĩrasubugue Titore mua pohrogue wadoretuhabu ñgure. Eropigu gajigũre Jesu yagũre ñgu mera obeobũ. ¿Tito mũare gajinore gũya aĩri mua ñacũ? ñgu yu iro dopa ta Goãmũ ñgu gamerĩ dihtare iigu ãhrimi. ¿Eropigu yu iro dopa ta iibiriri ñgu mua ñacũ?

¹⁹¿Ipũ mera gũa basi arĩ cãhmotarã iiri gũa mua pepicũ? Áribeaa. Cristo yarã ãhraa. Eropirã Goãmũ ñgu ñhuro mũare wererã iiaa. Yu acawererã, yu mahirã, mũapũre eropa arĩ werea mũare itamudiarã. ²⁰Yu erogue ejacũ yu gamero dopa iirã áriĩbiriboca mua. Eropigu mũare turaro guñaricũa. Eropigu mua gamero dopa iigu áriĩbiriboca yu sã erogue ejaqu. Gajiroa mua iicũ ñagu weregũca mũare. Erogue yu ejacũ mũapũ mua basi game dũyatorã, gajino erã opacũ ñarã ñhaturirã, mata guarã, mua gamero gajirãre tarinũgadiarã, gajirãre ñero wereniguirã, ñeri quere moarã, “Gũa tamera gajirãre tarinũgaa,” arĩrã, mua gamenerore goroweorã áriiboca

mua. Múa eropa iicũ bocaboca arĩgu, guñaricua yũhu mũare. ²¹Erogue yũ ejacũ mũare yũre guhyasĩrisãcũ iibocumi Goãmũ yũre. Eropigu arĩpehrerã iribojegue ñero iinirãre erã ñerire bujawerebiricũ iagu turaro bujaweregũca yũhu. Nome mera ñero iirãre, ñerire uaribejarãre iagu bujaweregũca yũhu.

Pablo weretuñumi

13 ¹Dohpaguere mua pohrogue wagu uhresubu ejagũca erogueru. Pesubu ero coreguere ejatuhabu. Eropigu mũare ire weregura. Ōpa āhraa Goãmũ yare erã gojarapũ: “Yujugũre mari dipuwaja moaboro core perã, urerã iğũre weresãro gahmea. Erã eropa weresãra pũhrũ dipuwaja moamasia mari,” āhraa Goãmũ yare erã gojarapũ. ²Iribojeguere ñero iirã mua arĩcũ mũare arĩpehrerã gajirã ñero iirã sãre dipaturi guhyadiaro mera weregũra. Yujusubu ejadi mua pohro dipaturi ejagu mũare ire werebũ. Dohpaguere mua mera arĩbigũ dipaturi mũare ire werebeogu iiaa daja: Dohpaguere mua pohrogueru ejagu, ñero iirãre diaye ta dipuwaja moagũra yũhu. ³Yũ eropa iicũ iarã, Cristo iğũ apidigu iğũ turari mera yũ buhecũ masirãca masidiarã. Cristopũ mũare doregu turatariagu āhrimi. Eropigu iğũ turarire iħmumi mũare. ⁴Mari iro dopa dũrucũgu, iğũ turabigu arĩgu, crusague sĩripũ. Eropa sĩriqueregu ta Goãmũ iğũ turari mera ojocarimi iğũ dohpaguere. Gũa sã iğũ iidiro dopa ta turabirã āhraa. Eropa turabirã arĩquererã Cristo mera ojocarirã Goãmũ ya turari mera arĩrãca mũare itamumorã.

⁵Eropi mũapũ mua basi ōpa arĩ pepique. “¿Diaye ta Cristore umupeogu āhriri yũhu?” arĩ pepique mua. Diaye ta Cristo mua mera majagu iğũ arĩbiricũ iğũ yarã gohra arĩbeaa mua. ⁶¿Múa guapũre “Jesu yarã iğũ apinirã arĩbeama,” arĩ pepiri? Iğũ yarã gohra āhraa gũa. Irire mua masicũ gahmea yũhu. ⁷Eropigu mua ñero iibiriboro dopa Goãmũre serēbasaa mũare. Eropa serēbasaa gũa mua ōarire mua iiboro dopa. Múa Goãmũ itamuri mera eropa ōarire iicũ iarã ōpa arĩboca: “Guapũ erãre ōarã wacũ iibu,” arĩboca gũa gajirãre guare umupeocũ iimorã. Eropa arĩ umupeodorebeaa gũa. Iri duhpburi arĩbeaa. Eropirã mũare eropa Goãmũre serēbasarã mua ya arĩburire serēbasarã iiaa. Ōarire mua iicũ tamerare gahmea gũa. ⁸Eropa dilta gahmea gũa. Goãmũ ya diaye arĩrire goroweomasibea gũa. ⁹Eropirã mua ōarire iicũ gamerã turabirã iro dopa arĩquererã gũa mucubiria. Ōarire iirãpũ mũapũ turarã arĩcũ ōhaa. Eropirã mua ōarã waborore Goãmũre serēbasaniguicãrãca gũa mũare. ¹⁰Eropigu mua mera arĩbigũ mũare ipũre gojabeoyugu iiaa. Múa pohrogue ejagu mua ñero iirã arĩcũ iagu mũare dipuwaja moagũca. Cristo yũre iğũ dorediro dopa ta mũare dipuwaja moagũca. Yũ eropa dipuwaja moabiriboro dopa ipũre mũare gojabeoyugu iiaa. Múa ōarire gohrotocũ iadiagu gojabeoyugu iiaa. Cristo iğũ dorediro dopa mũare itamudiaca. Mũare dipuwaja moadiabeaa.

¹¹Dohpaguere yũ acawererã, mũare ōadorea. Cristore guñaturanemoque. Eropa iirã ōarã arĩque. Mũare yũ wererare ōaro peenũque. Múa mera majarã

mera yujuro mera pepique. Mña basi òaro mera árĩque. Mña eropa árĩcũ ñagu mña mera Goãmũ árĩgũcumĩ. Ñgu marire game mahicũ iigu, marire òaro mera árĩcũ iigu ãhrimi. ¹²Eropirã mña mera majarãre bocatĩrirã erãre òaro mera mojoto ñeaque mña. ¹³Árĩpehrerã õ majarã Goãmũ yarã mñare òadorema.

¹⁴Mari Opũ Jesucristo mera mñare árĩpehrerãre òadorea. Eropigu Goãmũ ñgu mahiri mera árĩpehrerã mñare òadorea. Eropigu Espĩritu Santo árĩpehrerã mña mera òaro ãhrimi. Eropã ta árĩporo. Iripẽta ãhraa.